



# 中國大事記

民國四年三月十八日

●日兵三百名入奉天城……日本派兵至奉。以三百名入奉天城。另有千五百名分布鐵路一帶。奉天將軍張錫鑾向阻。日司令稱有辛亥前例。當經電京請示辦法。

同 十九日

●農商部組織權度委員會……權度法、權度營業特許法、權度法施行細則、官用權度器具頒發條例等。均已先後公布。農商部以此時籌備手續極繁。特組織一權度委員會。以研究關於權度一切重要事項。並擬具章程。呈請大總統備案。

同 二十日

●廣東舉辦全省漁團……廣東為漁業繁盛之區。沿海捕魚船隻不下數萬艘。有漁董何永昌洗世平等。具稟廣惠鎮守使。請照大總統公布漁輪護洋緝盜獎勵條例。舉辦全省漁團保甲。購置漁輪。以資捕魚捕盜之用。當經鎮守使駁令修改審核後。詳請參

謀本部內務部海軍部農商部立案。現由四部會呈大總統。以所定章程。尙屬周妥。請准予辦理。奉批照准。

同 二十一日

●農商部呈准各省財政廳兼理礦務職守規則……自奉令各省礦務監督署裁撤歸併各省財政廳後。財政部以歸併之初。亟應明定章程。以清權限。特擬訂各省財政廳兼理礦務職守規則。呈請鑒核。奉批照准。(規則見法令門)

同 二十二日

●裁撤籌備約法會議事務處……籌備約法會議事務處。本係前籌備國會事務局兼辦。自該局官制廢止後。經籌備立法院事務局接辦。現因約法會議議事告竣。於三月十八日閉會。該局局長顧鼐特呈請將事務處機關名目裁撤。

●交通部設立路電監查會……交通部前在部內設路電材料研究會。茲以路電兩項為交通要政。其應行研究而加以監察者。不僅材料一端。而積弊叢生。以材料為尤甚。特將前擬設之研究



28534 會。定名為路電監查會。內分兩處。一曰購辦材料監察處。一曰路電行政稽查處。並委任技監羅國瑞為會長。綜核司司長吳應科為副會長。

同 二十三日

●特任陸榮廷為耀武上將軍

●外交總長赴日使館會議交涉事件……駐京日本公使日置益。於十八日墮馬受傷。不能赴外交部會議。本日外交總長親赴日本公使館。與日使會議交涉事件。

●外交部及統率處通電各省報告中日交涉情形……外交部通電各省將軍都統巡按使鎮守使曰。中日交涉開議。相持匝月於茲。迄無頭緒。邇者日人頗持急進主義。銑(十六)日會議。對於南昌鐵路建築權。爭持尤力。督(二十)日再議。由本部提出嚴重質問進兵理由。據述一因交替。一因保商。經再三駁覆。仍支吾以對。馬(念一)日復由日使函請會議。其對於福建山東廣東南滿等處應得權利。催促限五日內答復。否則於中國有所不利等語。現本部經定敬(念四)日再議。務期勿損國體。勿失土地。以答諸公厚望。又統率處電曰。接奉天山東電稱。日人借換防為名。瀋陽新到兵四千人。濟南一千餘人。並砲兵一中隊等語。中日交涉。正在進行。而日人借名換防。增加兵力。實行威脅之計。已由外交部嚴重交涉。並電東奉文武。嚴密防範。鎮靜因應。恐遠道傳聞。或有失實。特電達。務希隨時曉諭軍民。勿主驚擾。又外交總長陸徵祥私函各省長官報告交涉情形曰(上

略)自日本提出交涉案以來。前後會議共十三次。由第一次至六次七次。直無頭緒之可言。由第八次起。日使始允將條件有修正之通融。并將條件電請該國政府訓示修正。故雙方暫停數日。又自第十次起至十二次會議止。兩方所議。均關於山東戰區之善後辦法。我國主張。依據國際公法辦理。日使亦表同情。惟會議中日使間提及因青膠戰務而影響於遼東半島之鐵道建築權。又因於臺灣戒備而影響於福建海峽之軍艦航行權。我國均極力拒絕。昨十三次會議。則全案確已修正。當將無關主權損害及能惹起萬國爭議各條。通融磋商。以期和平解決。(下略)

同 二十四日

●任命金邦平為農商次長

●財政部呈請增設交換貨幣機關……財政部以目今各省貨幣雜亂。兌換價格。時有高下。無從補救。特呈請於中國銀行內專設一處。辦理貨幣交換事宜。在各省偏設貨幣交換所。一方面可以雜幣換出正貨。一方面又可以正貨來兌雜幣。以為推廣銀元紙幣之近切辦法。並請簡派專員。會同中國銀行辦理。奉批照准。並任命趙椿年會辦中國銀行事宜。

同 二十五日

●令禁排斥日貨……令曰。中國與日本。地屬唇齒。素敦友睦。近有協議案件。外交部與駐京日使。掏誠磋商。可望和平解決。乃商民不悉內容。多生誤會。聞有排斥日貨及與僑寓日人偶生齟齬之事。殊為可惜。又有亂黨包藏禍心。乘隙煽惑。尤堪痛

恨。查通商貿易。及保護外人。均載在約章。凡我國民。共應遵守。值此歐洲多事。商務蕭條。詎堪再生枝節。小則累及商家。大則牽動全局。明哲士庶。當見及此。各將軍巡按使等。有地方之責。務宜隨時考查。剴切諭禁。認真防範。倘有亂徒假託名目。擾亂治安。着即嚴拿懲辦。用維大局而奠民生。

●公布陸軍審判條例……條例見法令門。

●公布軍刑改遺易棍條例……條例見法令門。

●政事堂禮制館呈准關岳合祀典禮樂譜……禮制館於上年十一月二十日奉令議關岳合祀典禮。茲擬成京師及各地方關岳廟祭禮樂譜上呈。並定張飛王濬韓擒虎李靖蘇定方郭子儀曹彬韓世忠旭烈兀徐達馮勝戚繼光(東序)趙雲謝玄賀若弼尉遲敬德李光弼王彥章狄青劉錡郭侃常遇春藍玉周遇吉(西序)等。為武廟從祀。奉批照准。

●四川匪首陳步三伏誅……陳步三前以營長率兵叛變。蔓延頗廣。近復勾結藏匪。佔據打箭爐。經官軍克復後。乘勢追擊。勢遂窮蹙。本日本在樂山縣捕獲正法。

### 同 二十六日

●鹽業銀行開業……參政院參政張鎮芳。前以鹽務占吾國財政上經濟上重要位置。曾擬具說帖。請辦鹽業銀行。以為流轉金融儲蓄本利發達營業之助。奉大總統交鹽政署及財政討論會覆核後。議決組織。即以張鎮芳充總經理。以袁乃寬為副經理。資本共五百萬。由財政部撥出二百萬。商股三百萬。於本日本開

始營業。其營業之性質如下。(甲)各運鹽公司可以保證公債券向銀行借貸。(乙)專賣局遇需款時。可向該行借貸。遇有贏餘。亦向該行存放。官運局亦然。(丙)保證公債券之發行付息償還。由該行經理之。(丁)遇有改良製造之必要。需購機器創立製鹽廠。得預計成本餘利。呈明政府。由銀行發行公債。(戊)獨立營業。暫不與中央各銀行相混。其範圍以關於鹽業上之設備改良匯兌抵押存放收付為限。對於國家。亦不擔任鹽業以外之義務。

●外交團撥還革命賠償餘款……辛亥革命各國損失。前在大借款內提出二百萬鎊。存儲五國銀行團。為賠償此項之用。旋經政府與各公使磋商。僅認賠直接損失。合計六十餘萬鎊。尚餘一百三十餘萬鎊。政府欲提作政費。而外交團則欲以此款充償還短期外債之需。近經外交部一再磋商。始決定以十分之六充政府使用。其餘四分。充償短期外債。本日本先將二十萬鎊交與財政部。其餘分期至五月二日止交清。

### 同 二十七日

●內務呈准現任實缺知事他省不得調用……內務部以各省現任實缺知事。屢有他省咨請調用情事。易滋流弊。呈請嗣後所有現任知事。非有特別情形。他省不得咨調。奉批照准。

### 同 二十八日

●海軍分區辦法……海軍部曾提出海軍分區及軍艦駐紮地點一案。茲聞總統率處集議表決。分為中南北三區。即以環臺至三

28536 郡爲中區。三都至澳門爲南區。鴨綠江至環臺爲北區。中區以應瑞號爲駐紮艦。司令處設於崇明島。南區以肇和號爲駐紮艦。司令處設於瓊州島。北區以新艦號爲駐紮艦。司令處設於秦皇島。

同 三十日

●申令垂誡官吏……令曰。民國肇基。承前清積衰之後。當暴徒斲喪之餘。萬端待理。若治琴絲。銳意經營。日不暇給。予以憂患餘生。不忍萬姓顛連。出任國家之重。所以朝作夜思。不敢自逸者。爲救國救民計耳。我官吏等。各有職守。卽同有救國救民之責任。自當以予心爲心。協力進行。國家庶有自危而安自弱而強之望。夫以今日國勢之不振。民困之未蘇。卽上下一心。臥薪嘗膽。猶恐於時無補。不免危亡。詎意京外官吏。習於晏安。罔知懲愆。或媮惰曠官。或瞻徇誤事。或奢靡害俗。或嬉游耗時。當此存亡危急之秋。曾無戒慎恐懼之念。哀莫大於心死。人心若此。國何以存。徵諸前史。凡開國之初。類皆法令嚴明。官無留事。斷無有文恬武嬉而可以坐致治安者。誠以人人奉職。國不期強而強。身受其福。澤及子孫。人人廢職。國不期亡而亡。身罹其殃。遑恤厥後。爲一時之偷安。忘萬劫之不復。志趣頹放。精氣銷亡。人非至愚。何忍出此。三載以來。迭加訓戒。而泄沓之習。仍未盡除。逸樂之風。勢且日甚。固由藐躬德薄。感化無方。亦所司陽奉陰違。視爲具文。故不能收懲一儆百之效。予視官吏如子弟。憫其昏迷。不憚言之諄諄。

以期改悔。茲特明垂四誡。永作官箴。百爾在位。懍之毋忽。

一曰戒媮惰。設官分職。各有責任。辦公時間。固宜兢兢從事。卽當退食。猶應盡力研求。古人所謂進思盡忠退思補過。其敬事可知。一人敬事。一事見功。人人敬事。事無不舉。國家何患不強。若旅進旅退。毫無實心。大吏畫行。小吏書到。於公事之原委若何。辦法若何。絕不研究。號爲當差。日復一日。其人不必要顯有過失。卽此媮惰曠官。而庶事之墮壞於無形者多矣。聖人爲委吏乘田。尙有會計當牛羊苗之責任。况有大於委吏乘田者乎。長官職在表率。屬吏職在奉行。秩有尊卑。急公則一。素餐尸位。當共恥之。

一曰戒瞻徇。我國生計艱難。人浮於事。自食其力者寡。浮游無業者多。此輩倚賴性成。營求無厭。而官吏瞻徇情面。轉相屬託。相習成風。毫不爲怪。不知此類游民。專以餽口謀利爲宗旨。絕無愛國思想。亦無任事能力。稍加引用。鮮不僨事。且公家人有定。庸劣者以徇情而進。則幹練者將以失援而退。極其流失。必至無一人辦事而後已。前經嚴令戒勅。嗣後各長官應切禁所屬。互相請託。如有犯者。立予彈劾。若長官有請託情事。并准屬吏據實舉發。以絕瞻徇。

一曰戒奢靡。國用浩繁。財政支絀。所有文武官俸。非出之於水深火熱之民生。卽挹之於剝肉補創之國債。雖重祿勸士。國有常經。而古人於一絲一粟。尙思來處不易。今爲何時。祿從何出。心目間時懸一民力拮据之狀。國債窘迫之情。稍有天

良。顧忍以奇痛之金錢。供無名之揮霍乎。近有藉口進化。務爲虛糜。一餐之費。至數十金。一日之劇。至數千金。祿不足給。勢須改操。假公濟私。何所不至。蓋奢侈雖爲私德之失。其流毒足以蕩公德而無遺。既失之奢。必敗於貪。此是相因之勢。前清之亡。由於在位者用財無節。寵賂滋章。鬻爵於朝。伏戎於莽。百事敗壞。顛覆隨之。殷鑒不遠。匪細故也。

一曰戒嬉遊。前清未造。不肖士夫。遊戲徵逐。風氣所趨。至於亡國。一博萬金。爲世詬病。改革以來。此風未絕。賭博之禁。迭申嚴令。而京外官吏。竟有明知故犯者。昔人所謂牧豬奴戲。今則高位素族。夷然爲之。且賭者貪之漸。盜之媒。衣冠之人。行同敗類。是何心肝。言之可恥。須知平民賭博。猶犯刑章。官吏爲之。何以服衆。亦有本非所好。受人牽率。不知有志之士。貴能轉移風氣。詎可爲風氣所轉移。或藉詞於餘力消遣。無害公事。不知人生精力有限。於無益之事。多一分消耗。必於應用之處。少一分運行。國家岌危至此。而官吏舍業以嬉。不知危亡爲何事。玩時愒日。尙何盡職之可言。官吏賭博。爲近日惡風。其尤著者。予所稔知。冀其自新。稍留餘地。長此不改。惟有執法以繩其後。言盡於斯。各宜猛省。

自經此次誥誡之後。儻有不知警悟。仍蹈前轍者。一經查出。或被人舉發。定當治以上玷官箴下害風俗之罪。予固不願察察爲明。然國家非一人之私。治國家亦非一手足之烈。官吏之敬事與否。實國家隆替所關。予亦何能曲徇。京外文武長官。有

表率之責者。務各切實申做所屬。如尙沿前弊。除將該官吏等依法懲戒外。仍惟該管長官是問。著將此次申令。各錄一道。懸挂京外各公署。並著內務陸軍兩部。印刷分寄京外有職人員。互相規戒。暨由政事堂飭銓鈹局於給發任命狀時。印發一紙。俾各官吏矚目警心。懸爲厲禁。警不攻疾。無以處方。國不去蠹。無以施政。天監有赫。君子懷刑。毋負予耳提面命之意。

### 同 三十一日

●派員赴各省考核督催整理場產事宜……鹽務署前奉大總統交諭整理場產。當由該署擬定辦法。分電各省舉辦。茲復以整理之初。百端待舉。呈請大總統分區派員前往考核督催。當奉批令准派龔心湛方碩輔分往各該區會同鹽運司等考核督催。

### 四月 一日

●公布四年內國公債條例……條例見法令門。

●前署新疆伊犁縣知事廖焱犯罪槍斃……廖焱因前在署新疆伊犁縣任內。勒捐浮收。枉法取財。並借採買軍糧爲名。尖斛盤剝。賤價折收。以及拉馬勒贖苛罰婪索等事被控。經伊犁道尹許國楨澈查。供證確鑿。所得贓款。至四萬二千餘兩之多。由新疆巡按使楊增新呈請依照軍法嚴予懲治。奉令該知事着即褫奪陸軍步兵中校現職。按法卽行槍斃。以昭炯戒。

### 同 三日

●學術評定委員會歸併……學術評定委員會。本爲獎勵國家學術而設。現因國款竭蹶。教育部特將該機關歸併。由部中會計

28538

科兼辦。擬俟國款充裕。再籌進行。

同 五日

●駐京英使呈遞國書……英國駐京公使朱爾典。本日偕參贊等賈英皇像片及親筆國書。謁大總統呈遞。

同 八日

●漢口訂立禁煙合同……江漢關監督兼任湖北交涉員丁士源。以漢口租界鴉片充斥。特與英法俄德日五國領事訂立合同。協助嚴禁租界私售鴉片煙土及嗎啡毒質。已一律簽字。

同 九日

●令撥款賑四川旱災……川省自上年亢旱。糧價騰昂。至今春分已過。雨澤未霑。山糧盡枯。小春失望。田水枯竭。播種無從。東南西北各道。幾於無縣不荒。貧民採食草根樹皮充飢。被災之重。為數十年所未有。經該省兼代巡按使劉登澤電呈大總統。請撥發賑款。以便散放。並由四川旅京官紳施愚等公呈。請由交通部應還川路公司頭批路本內。借墊銀二十萬兩。飭該部先行提交財政部。電飭川省財政廳。於應行解京款內就近劃撥。俾資救濟。奉令著財政部迅即發銀十萬圓。并由本大總統特捐銀一萬圓。其旅京官紳所請撥用路款。亦即照准。飭該省財政廳分別墊撥。即由該兼代巡按使會同督辦該省賑撫事宜會鑑。派員分頭切實散放。

同 十日

●內務部籌設京師傳染病醫院……內務部以近日京師內外城居

戶。時有發生傳染病症。亟應設置傳染病醫院。以防疫症而重衛生。特在市政公所工巡捐款項下撥銀二萬圓。為開辦該院經費。並呈大總統。請每年由國家補助常年經費四萬圓。列入四年度預算。奉批照准。當由該部籌擬開辦矣。

●外交部規定華僑區域……外交部因各埠華僑。日益增多。亟應設法聯絡。惟區域不明。則事多扞格。特將各埠地點規定。以便有所依據。(一)荷屬之爪哇。蘇門答臘。婆羅州。西里伯。(二)英屬之新加坡。麻六甲。霹靂島。檳榔嶼。(三)緬甸之仰光。(四)印度之加里格達。(五)法屬之安南。(六)暹羅之藍谷。(七)美屬之菲律賓。(八)澳洲之新金山。

同 十一日

●山東鬍匪騷擾……鬍匪三百餘人。自青島至即墨境內。沿途焚掠。經當道派兵。馳往勦辦。

同 十二日

●長沙增設美國領事……美國在長沙交涉事務。本由漢口領事兼管。現因長沙商務。日見繁盛。特增設領事。以處理交涉事宜。已由美政府派代理上海會審公廨陪審官約翰生為美國駐長沙領事。其領事職權區域。包括湖南全省云。

同 十四日

●公布地方自治試行條例施行規則……規則見法令門。

同 十八日

●公布電信條例……條例見法令門。

# 外國大事記

民國四年三月十一日

●外交部接駐京美使照會……駐京美使。奉本國政府訓令。照會我國外交部。謂美國與中國締約。享有種種權利。美國無論如何。不願拋棄云云。

同 十九日

●舉行陸軍大學等校宣誓大典……陸軍大學校中央測量學校。定本日齊集武廟舉行宣誓大典。航空學校則定二十日在校舉行。

由大總統派蔭昌前往監臨。

同 二十日

●中日交涉會議停止……自日本向我國提出要求後。外交部連日與日使迭開會議。尙未解決。本日日使奉本國政府訓令。請外交部暫行停止。

捕拿英國汽船。要求明示其理由。

同 十二日

●德兵大集土京……達旦納海峽要塞內八堡壘。仍堅守該海峽。與聯合艦隊交砲火。德兵集二十五萬人於君士但丁堡。嚴防聯軍之侵入。

●德艦轟沉英船……英國汽船哥溫安喀色爾。在智利國可臘爾港附近。被德國巡洋艦特力斯鄧轟沉。

同 十三日

●俄國威第伯爵逝世……伯爵即前與日本小村氏議日俄議和條約於朴資茅斯者也。本年六十六歲。

●美墨之交涉……美國人麥麥那士。向居墨都。建有住宅。該市美人。多至其家避難。本日日爲墨國革黨柴巴達氏部下所戕。

●西歐之戰局……本日法國之公報云。香檳業方面之法軍。冒德軍之抵抗。繼續前進。至爲法軍佔領之地點。德軍全然不能奪回。德軍損失甚巨。其兩聯隊遂至全滅。遺棄屍體一萬具。被捕者二千人。此次法軍之方略在於遙助俄軍。令德軍耗費多量之彈藥。且阻其運兵前往東歐之舉。比軍在尼于巴特東南須爾大格方面進佔陣地數處。

●君士但丁堡之恐慌……因英法合攻達旦納海峽。土京之恐慌達於極度。該處駐紮之德與兩使及其家族等。已於本日離任。移住於保加利亞邊界附近。

28539 ●英國與墨西哥之交涉……英國政府詰問墨西哥喀浪石。何故